

【自家大自家】林伯殷原作

該個人係麼儕？仰會電視逐日有佢个新聞？仰會有恁多人請佢簽名？仰會有恁多人聽佢演講？係哪齣電影个明星？係哪個有名个歌星？抑係哪種職業運動个球星？全毋係。佢係一間有名公司个執行長，來臺灣摻大家分享人工智慧个發展，同時，也有其他重要晶片公司个執行長，來參加臺北電腦展个活動。仰般佢兜會跔跔對外國來到臺灣呢？當然有理由啊！該就係，臺灣有全世界最先進、最完整个晶片製造系統。

在世界晶片个分工系統肚，臺灣最強个部分係晶片製造，差毋多，最新設計个晶片，全部係交分臺灣來生產。現代晶片个發展係越做越幼秀，功能越來越強。晶片製造公司為著愛開發新个製造技術，長下會投資大量資金，集合幾下百、甚至幾下千儕來做研究，就係講，愛大自家為共同个目標來打拚正有法度做得著，這摻單淨倚恃自家煞猛做頭路來講，有當大个爭差。

所以，有名个晶片公司執行長毋會斯強調自家公司產品个成功定，還會記得承蒙好得有臺灣恁湛斗、恁有紀律个晶片生產團隊來幫襯。見擺上下班時間，想著該恁多在科學園區來來去去个人，就知，係

無大自家个努力，臺灣仰會有恁好个晶片製造能力，仰會受著國際个恁多肯定。

隨等晶片个用量緊來緊大，恁多年來，幾多原旦係客家人耕種个山林、農田，既經變做電子廠摻大樓，想看一下頭摻摻做事个農家人，來思念自家个長輩斯無恁該。毋過，這種自家認分，頭摻摻摻事情做好，堅耐个精神，對農業時代變到資訊時代後並無失忒去，像人也毋識離開過原來个所在，還係日合夜繼續留在廠房裡肚。這兜摻臺灣合作个晶片公司執行長，認為自家堅耐个傳統，就係臺灣晶片製造个正經基礎。

現代工業產品已經離毋開晶片咧，臺灣个晶片公司也有去到美國、日本、德國等先進國家設廠，佢个工程師跔等去到世界各地，大自家摻晶片製造技術傳揚出去个時節，也分人更加有機會做得來感受著臺灣人自家个堅耐精神。

【目汁个故事】徐秀英原作

該日下晝，看著一張當錫人个圖像——顯微鏡底下个目汁花。逐張目汁花看起來斯像一隻細星球，頂高个花紋逐隻斯無共樣，有像雪花形个，有像石英結晶體个，乜有像弄毛蟲个，又神奇又得人惜。攝影个作者講，逐滴个目汁，用目珠看起來都係晶亮晶亮，毋過在顯微鏡底下，喜怒哀樂个情緒變化都會出現無共樣个目汁花。對看著這篇文章以後，逐擺看著人出目汁，就會緊想佢背後个故事。

佢係一個「噉點」當低个人，歡喜會流目汁、感動會跌目汁；當關个時節會噉、悲傷个時節會大噉。屋下人長下笑佢，目珠有安水龍頭，一擰開斯嘩啦啦緊流，毋過難免會堵著噉無目汁个時節。斯像有一擺用電腦打報告，作業速度一路開青燈，就在會完成个時節電腦嘎當機，看等烏疏疏个屏幕，就像佢烏疏疏个失落心情。等到再過開機，資料斯伸著一半，該兩時就恁樣目金金仔奈佢毋何。看著在三更半夜，歸屋下人睡到當落覺，伸佢緊摳嘴，緊流下知差个目汁。

目汁係偲佢膠外背聯絡情感个一種表達方式。所以，所有个痛惜、期盼、悲傷、感動膠夢想个故事，都做得真實傳達。在偲佢个生活裡背，輒常乜會在車頭抑係機場，看著一幕幕無共樣个場景。該片有人送

別親人遠去他鄉，離別个目汁張等思念膠期待，還較多个係掛吊膠毋盼得；這片有人插等轉來个好朋友，該歡喜个目汁裡背，恁恁都係再過重逢个快樂膠幸福。佢想，目汁毋單淨係情感个出口，還有一種無形个力量，佢做得穿過時空，傳達溫暖膠勇氣分思念个人。每一滴感動个目汁，都係關愛个力量膠信念。

還細時節，自家當會用使頓屈、打潑賴，去得著想愛个東西。阿姆講，目汁毋係武器，乜毋應該係手段。這下佢知咧！目汁係珍珠、係鑽石、係親戚朋友無瑕个愛。

編號 3 號

【一領讀書衫】黃美貞原作

該年个新冠疫情，對一群畢業生最大个遺憾，斯係大家單淨做得在線上講正來寮，無法度摺同學共下參加畢業典禮。

有一日，大學三年生个阿德收著母校寄來个電子信，講愛邀請同學轉去參加畢業典禮，正經係當有心。聽校長講，已多該屆个同學試著，無摺大家共下在禮堂唱畢業歌，在校園肚共下結胸花翕相，斯無像畢業。有影，有緣做同學，又有當多讀書、打拚、搞寮个生趣回憶，係難得个情份，所以，學校特別安排在校慶該日，請大家著讀書衫轉來參加典禮。

阿德有一隻習慣，係用毋著个東西，佢會遽遽處理忒，看係回收抑係掉忒<sup>1</sup>，所以佢个間房肚總係伶伶俐俐<sup>2</sup>，無麼个舊東西。這擺，愛尋出三年前个舊衫，根本斯係兔仔角龜仔毛——無可能个事情。雖然學校乜有分大家方便个選擇，著白色个面衫、烏色个長褲斯做得，毋過，大家還係會想尋轉該兜青春个蹤跡、珍貴个回憶。

做阿姆个人，斯算俖仔無講，乜揣得著佢个心思。佢先上網去尋看啊，哪位有賣成功高中个制服，電話聯絡好勢。想著撫身係圓个，用講个毋當用比个，尺寸好勢還愛繡學號上去，黏時帶等阿德平常著个面衫

出發，一息都儘採毋得，這斯係阿姆个愛，點點滴滴，來為子女設想。

該日打早，阿德暢靈靈仔著等新衝衝<sup>3</sup>个讀書衫去學校，看著三年無見著个同學，除忒歡喜還係歡喜。大家共下翕相，講笑，湊等去食晝，斯像讀高中該下。還有同學問起：「阿德，你个讀書衫仰還恁新，一息汗點都無？摺印象中差當多呢？」知得係阿姆个用心以後，大家雖然感覺已超過，毋過還係當欽羨，原來時行个儀式感斯係恁樣形啦！

一領讀書衫做得分俖仔留下恁好个回憶，實在當值，最重要个還分後生人了解，把握機會創造回憶，該種價值係用錢斯買毋著个。

---

1 掉忒：音 tiau／ted；丟掉、拋棄。

2 伶伶俐俐：音 lang lang li+ li+；乾淨整齊。

3 新衝衝：音 sin\ chung\ chung\；很新的。